

律
疏
補
書

律集前書

益公題跋卷之九

跋劉仲威蘭亭叙

晉人風度不凡于書亦然右軍又晉人之龍虎也
觀其鋒藏勢逸如萬兵銜枚申令素定摧堅陷陣
初不勞力蓋胸中自無滯礙故形于外者乃爾非
但積學可致也昔梁昭明以一語不中廢此敘而
不錄後世因以絲竹管絃爲重複之病至齊梁小
兒僞妄之作則信而不疑是蓋以微瑕棄玉而以

玉表重珉也唐太宗親傳晉史備載斯文豈無意
耶雖然翰墨如此閱千百載終當輝映學海後之
覽者亦將有感於此固右軍期望於士大夫之志
也故吾樂爲仲威言之紹興乙亥九月二十七日
書

跋周德友所藏蘇養直詩帖

後湖居士歌詩清腴益江西之派別而字畫健逸
又老坡之苗裔也吾宗德友丈寶其遺墨殆且百

紙可謂富矣僕生也後不及從居士游今以德友
數十年染指之勤一旦得大嚼焉正使親見揚子
雲所獲未必如是之富也欣玩彌冒拱揖不暇姑
識歲月而歸之紹興戊寅十二月旣望

跋宋景文公墨蹟

柳子厚作司馬刺史詞章始極其妙後世益信窮
人詩乃工之說常山景文公出藩入從終身榮顯
而述懷感事之作徑逼子厚贈楊憑等詩自非機

杼旣殊經緯又至安能底此殆未可以窮達論也
紹興三十年十二月二十一日

跋劉子澄曾祖帖

大中大夫劉敦思父與原父貢父兄弟也少嘗令
桐廬元豐庚申復來守睦歲久事逸而邦人猶能
頌其清白董氏圖經實載之紹興壬午其曾孫左
迪功郎清之清之得李尚書公擇帖將刻石烏龍
山中公擇仕久且顯其夢奠也甥黃魯直爲哀賻

贈質所服帶僅能經紀家事平生清白身後益見
清白所以脩身也身脩則無不治矣思父真公擇
之友哉是宜特書使來者知爲吏之本

柴翼秀才著書求跋語

三衢柴鴻舉著易索隱若干卷芻言四卷可謂勤
且博矣談禪不必病戒律用兵不必廢行伍講解
會粹之學有功於道豈少哉子夏曰日知其所亡
月無忘其所能此鴻舉之志也故爲發明之紹興

三十二年閏二月一日

題中書舍人趙莊叔字

莊叔書此數語所謂非苟知之亦允蹈之者年四十死矣或謂養生爲無益蓋非也莊叔若不作句天上則當脩文地下耳紹興壬午閏二月二十五日

跋宗室土會所書周以宗強賦

漢二獻皆以好書聞故傳國亦皆最久彼其遺子

孫者固有以致之矣今賀王不以金譜玉局是務
而孜孜短檠佔嗶間無惑乎文章盛於王門而餘
澤遠及苗裔也僕少時應舉覓官乃未嘗手抄一
賦見此不覺汗下壬午十月十四日

跋湖州沈壽岡之祖墓銘後錢藻撰

志墓有美而無箴久矣然東坡謂錢翰林陳義崢
嶸不少自貶則其所以稱寺丞其諸與乎人稱者
歟隆興元年正月二日

跋平江張漢卿推官華山就隱圖

洞庭楚之巨浸而山乃在震澤中其產橘柚皆足以冠天下世謂地脉潛通宜哉太華之峰有玉井井之蓮十丈自古記之矣今吳郡有華山山有天池池嘗有異蓮其地脉亦洞庭比與儒者知禹貢職方氏必以斯言爲疑安知造物之事方輿直隸土耳況區區秦吳間相去殆不能以寸復何疑哉誰能補圖經之闕願以是告之隆興元年四月十

一日

跋羅良弼家歐陽公唐草贊

長卿博雅好古藏本朝名公帖至數十百紙以那爲首不在此藁乎隆興癸未十二月九日

跋宗室世颺與教授閻丘仲和帖

孝穆公宗室祭酒而敬愛儒者如此子孫其有不樂善者乎一傳爲安定郡王表之遂以才名發聞於世今忠訓郎子崧公之諸孫也醇雅好書驟見

之疑其爲寒士尙寶此帖籀金可散此不可失也
隆興二年五月十一日

跋黃承議宗諤所藏文潞公劉莘老韓師朴
諸公題顏魯公懷素書

予昔在館閣凡古今法書盡見之而魯公祭亳州
刺史文懷素書皆在焉嘗以告監少刻爲中興法
帖數十卷使學士大夫盡得寓目亦一段奇事諸
公雖然予言而未暇也黃君延老蓄元祐名卿二

跋久矣今歸會稽道行間盍以是告有位者乞併
刻之殆將補商頌之亡合豐城之劍邪隆興二年
五月十七日

跋黃廉夷仲行狀

熙寧元祐人才參辰相避冰炭不相入其或毀譽
兩忘者非棲遲下位而不與事則脂韋其間而不
任事者也給事中豫章黃公在熙寧時實任御史
將使指在元祐時則椽公府踐禁省出入要劇獨

無間言其致此必有道矣昔予外祖安陽王公脩
泰陵正史閱五年於公帖傳或與筆削焉紹興辛
巳予攝太史牛馬走訪求故史已亡三篋而新史
殊未殺青惟得公行事於新舊實錄而參校山谷
十詩如金門戰袍之語猶未盡解也奉祠歸廬陵
適公之孫季文爲郡丞始見山谷所作行狀然後
知公所以被遇兩朝始終如一者忘已徇公中立
不倚故也季文謂山谷詩已載集中而行狀止藏

於家欲與舊傳併刻之非特備史氏他日未擇亦使生知前輩立朝本末如此予贊曰明著祖烈古人以爲崇孝山谷斯文黃氏之鼎銘也可無傳耶季文因詩題其後隆興二年十月十五日

跋劉原父貢父家書

前輩日遠公之文集僅有蜀本而於全書學者或未盡覩况其遺墨尺牘豈易得耶吾友子和子澄公之從曾孫也樂道嗜學篤行能文寶此數帖非

特如鄭公之笏而已要須挺挺有其風烈乃無媿
耳昔二先生皆以忠愿爾雅之文雋明邁往之氣
事累朝爲名臣然不得以直玉堂議者惜之不在
其身予於二君深有望矣隆興二年十一月十五
日

又跋原夫貢父和仲馮帖

此墨莊寶章集也更數百年學者讀三劉漢書而
息其人或於蛛絲煤尾中覩此帖宜如何愛慕耶

隆興二年閏十一月二十三日同家兄子友子中
胡和懷趙從季觀于永和本覺寺而歸之子澄父
跋蘓子由和劉貢甫省上示座客詩

集中觀詩難爲詩猶羣姝中觀色難爲色也吾友
陸務觀當今詩人之冠冕數勸予哦蘓黃門詩退
取欒城集觀之未識其旨趣甲申閏月辛未郊居
無事天寒踞爐如餓鴟劉友子澄忽自城中寄此
卷相示快讀數過溫雅高妙如佳人獨立姿態易